



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Beirut nung Hamas ketdangsür Saleh al-Arouri tepset

NE United FC-i Coach Benali den tenangzüktepba yanglushi

VOL. XXI NO. 81 (ADOK 81) DIMAPUR

YANGTEPNÜ (THURSDAY)

ANJETI (JANUARY) 04, 2024

₹ 5.00

CAA cut-off date Dec 2014 sülen atsülangtsü akok

New Delhi, January 3, 2024 (Agencies): Citizenship Amendment Act (CAA) ajanga India senso akümtsü atema cut-off date ji December 31, 2014 sülen atsülangtsü akok.

CAA mapa tenzükba sülen Afghanistan, Bangladesh aser Pakistan nung tamangba yimsü tsütsü reshikangshirtemi dedicated portal ka ajanga online nung senso akümtsü atema tenüng agütsütsü akok.

Lok Sabha elections 2024 matongdang Citizenship Amendment Act (CAA) indang rules sangdongtsü imlar.

2019 küm CAA agizükba sülen CAA rules atema mapa tenzükba liasü.

December 10, 2019 nü Lok Sabha nung CAA agizük aser iba sülen anogo ana sülen Rajya Sabha nunga benoka liasü.

Ashishitep aketba CAA ajanga Afghanistan, Bangladesh aser Pakistan nungi December 31, 2014 matongdang India-i aruba non-Muslim immigrants nem senso agütsütsü nükjidong lir.

Muslim nunger balaka bendanga amshiba aser parnok medendaktsüba atema nisung aikati iba Act ashishitep aser aija liasü.

Lilong lendong nung tasür 5 jungogo

Imphal, January 3, 2024 (Agencies): January 1, 2024 nü Manipur kübok Lilong Chingjao nung lendong atalokba sülen tasür ajak agi nisung 5 kümogo. Bodbarnü Raj Medicity, Imphal nung arishi küm 37 tain nisung ka asü.

Iba anogo khasetba nisung tasümgangtem JNIMs hospital, Imphal nung dang yua lir.

Chief minister N Biren Singh aser Lilong Chingjao tatalokba anema tentetba Joint Action Committee (JAC) tsüngda nangzüktepa aliba ama mapa inyak nung dang tasümgangtem agitsü.

Manipur Chief Minister aser JAC tsüngda nangzüktepba onüktem rongnung tasür kibong shia nem Rs 10 lakh aser sorkar mapa kaka agütsütsüba dena lir.

Maneni, iba lendong nung yirurtem nema senotsü teyari agütsütsü aser parnok medical expenditures ajak Manipur sorkari menoktsü ta nangzüktepa lir.

JAC-isa iba ken o National Investigation Agency (NIA) nem

bushisüngdang südaktsütsü takhangba agütsüo.

Manipur nung Meitei-Pangal nunger alidaki Central & State forces aser agencies, mesüra tanga independent organisation shinga arutsü memelar ta metetdaksüo.

January 1 aonung 7:00 ako meta Thoubal district kübok Lilong Chingjao nung nisung 4 khaset aser 14 yiruja liasü.

Revolutionary People's Front (RPF)-i nisung 5 asüba atema mangyimba metetdaksüo.

RPF indang STAFORCE (Special Task Force)-i drug shibelener Md Hassan aputsü ao ta RPF Assistant Secretary, Publicity Bangkim-i sangdong ka nung ashi.

Iba tatalokba atema Manipur sorkari züngsem 6 agi akümba Special Investigation Team (SIT) ka tentetogo.

SIT-i anogo shia anaben Thoubal district nung Superintendent of Police (SP) nem bushisüngdangba osang agütsütsü.

NE tsürtemi NCC R-Day Camp nung shilem agitsü

New Delhi, January 3, 2024 (Agencies): North East nungi tetsür 45 agi akümba band kati tang mezüng atema National Cadet Corps (NCC) Republic Day Camp 2024 nung shilem agitsü.

Tetsürtem ya arishi küm 13-15 purtem lir aser North East sobaliba takar tenüng nung shilem agitsü. Iba ajanga NCC ya linük kübok kinük ajaklen lir ta asüba jangjatsütsü.

January 3, 2024 nü Delhi Cantt. nung DG NCC Lt Gen Gurbirpal Singh-i osangbener senden ka nung jembidang cadets 2,274-i shilem agitsü ta ashi.

Ita ka piyong agitsüba camp nung tetsür 907 dena lir ta Lt Gen Gurbirpal-isa ashi.

NCC pur ya Jammu & Kashmir aser Ladakh nungi 122 aser ano North East nungi 177

dena lir. Maneni, Youth Exchange Programme (YEP) kübok medemer linük 25 nungi cadets aser officers adentsü.

Republic Day Camp indang nükjidong ya linük sobaliba takar sayutsü aser cadets tangatetba tashi itdaktsütsü atema ayongzük ta DG NCC Lt Gen Gurbirpal-isa metetdaksü.

Vice President, Raksha Mantri, Raksha Rajya Mantri, Chief of Defence Staff aser Service Chiefs asemprongi iba camp semdangtsü.

Lt Gen Gurbirpal Singh-isa 2023 nung NCC ajanga maparen balala inyakba osang lemsatop.

2023 küm Ek Bharat Shreshtha Bharat camps 39 ayongzük aser iba nung Vibrant Village area camps 2, DRDO camps 3 aser Aerospace camp 1 dena lir.

MGNREGS workers-i Aadhaar sendaktep nungang sen angutsü

New Delhi, January 3, 2024 (Agencies): Centre-i January 1, 2024 nungi Aadhaar-Based Payment System (ABPS) tenzüktsü lemtetba ajanga Mahatma Gandhi National Rural Employment Guarantee Scheme (MGNREGS) kübok nisung crore 1.78 tashi agienogo.

MGNREGS kübok active workers crore 14.32 aliba nungi nisung crore 1.78-i iba teyari mangutsü.

MGNREGS kübok nisung kati tesüba küm asem tsüngda anogo ka danga mapa inyaka lira pa/la ji active worker ta züngshir.

MGNREGS ajanga yimsüngtem nung aliba nisungtemi anogo 100 mapa inyakba sen agütsür.

Union Rural Development Ministry indang MGNREGS portal nung January 1, 2024 nü agütsüba osang ajanga mapa inyaker nisung crore 1.78 indang ABPS linkage process metembangba shia lir.

ABPS kübok mapa inyaker ka indang Aadhaar number ji pa/la indang MGNREGS job card aser

ano bank account den sendakteper. Iba ya National Payments Corporation of India den sendaktepa lir.

Union Rural Development Ministry-i tang agi pungubenbuba ABPS maparen tenzüktsüba anogo atsülangtsü memulungi Hombarnü technical timtem mesüra Aadhaar dak sendakba onük lira iba maparenji metembang ABPS nung medendaktsüi atatsü ta shiogo.

Centre sorkari ABPS mapa tenzüktsü lemtet ya civil society züngsemtemi aitsür aser iba onük ya political party aikati magizükter.

Modi'er sorkari taochi maliba küm tasen sempet ka agütsüo ta Congress-ibo aitsüo.

ABPS ya 2017 küm tenzük aser iba ya mapang shitak nung senotsü agütsütsü atema tenzükba liasü. Yaküm February 1 nungi Centre-i ABPS ya kechi südir süaka inyaksü ta lemteta liasü.

Ajisüaka, mapa tenzüktsüba anogo pezüben tashi melenshia liasü. Mezüngji April 1, iba sülen

July 1, September 1 aser tatema December 31 tashi atsülang. MGNREGS mapa inyakertemi lungkak aitba aser state sorkartemi iba maparen tembangtsü mapang meshiba ajanga Centre-i anogotem atsülanga aru.

Rural Development Ministry-i joko ABPS mapa tenzüktsü atema mapang matsülangtsü ta metetdaksüo.

"State ka nung district ka kübok gram panchayat kari technical khuret mesüra Aadhaar dak sendakba khuret kar ajurua khuret mekottet tashi India sorkari APBS nung medendaktsüi atatsü akok" ta Ministry-i metetdaksüo.

MGNREGS kübok mapa inyaker nisung crore 25.25 tashi tenüng zülüoka lir. Iba nungi crore 14.32 (56.83%) active ta züngoka lir.

Nisung crore 14.32 nungi 87.5% (12.54 crore) tashi ABPS payment angutsü aser parnok nem mapa agütsütsü ta Rural Development Ministry-i January 1, 2024 nü metetdaksüo.

Manipur nung mepetmesü adoker ita 8 abensaogo

Imphal, January 3, 2024 (Agencies): Manipur nung kin o kin tsüngda mepetmesü adoker ita 8 buba ajungba tenüng nung Kangla Gate nung candle light sentong ka ayonga agiogo.

Bodbar nikonngdang Meitei nunger telok FAMBEI ajanga iba sentong ayongzükka agi.

"India sorkari iba ken o angateteptsü atema mebilemtsür. Iba mepetmesü adoker ita 8 jungaka Prime Minister Narendra Modi-i ola madokba aitsür" ta FAMBEI züngsem Ashem Nirmala-i ashi.

"Modi-i Manipur alinük atema dang temulung agütsür saka state nung nübortem atemabo mebilemtsür. Iba jagi asen nübortemi sorkar anema

noktakba ya asen tai masü. Iba ya state aser Centre sorkartem tai lir" ta lai ashi.

Union Home Minister Amit Shah-i Manipur atema mebilemtsüba ajanga tanaben semdangi marur, ta Nirmala-isa ashi.

"Iba mepetmesü adoker Home minister-i Manipur khen dang semdang saka iba sülen pa tanaben maru. Iba ajanga India sorkari Manipur tebilemtsü atema temulung magütsüba sayur" ta laisa shisem.

Külen, Kuldeip Singh ya Unified Command chairman asütsü metemsü. Manipur Chief Minister-i pa mapa melenzüktsüla, ta Nirmala-isa ashi.

CoTU-i AFSPA benoktsü

akhanger:

Külen, Committee on Tribal Unity (CoTU), Sadar Hills ajanga Union Home Minister Amit Shah dang Moreh nungi 'Meitei police forces', 'Meitei terrorists' aser Valley-Based surrendered Insurgents groups agientsü takhangba agütsüo.

CoTU-isa Amit Shah dang lendenlen aliba district tem nung Armed Forces Special Power Act (AFSPA) tanaben benoktsü ayongzükogo.

Meitei state forces' ajanga tashiyim inyakba aser Kuki-Zo district tem nungi parnok agientsü takhangba agüja CoTU Sadar Hills aser ITLF Churachandpur ajanga Bodbarnü ghonda 24 mokdanga liasü.

Indo-Myanmar arrtsülen Free Movement Regime agientsü

New Delhi, January 3, 2024 (Agencies): India-i Indo-Myanmar arrtsülen Free Movement Regime (FMR) anentsü sentong lir. FMR ajanga India-Myanmar anasa alirtemi visa melii kilometre 16 tashi senzütsü melar.

Ajisüaka Centre sorkari Myanmar arrtsülen FMR anentsü lemtetogo ta osang angazükter.

Iba ajanga Myanmar tsütsü nungi arunürtemi India ketdangsürtem dang nungi travel documents meshitsüsa akümtsü.

Myanmar nung amenoka aliba telungpurtemi FMR tim

mesüi amshir aser parnoki India nunger amaker ta shia Centre-i iba lemtet agi.

Maneni, ozüng alema arurtem noktangtsü aser Indo-Myanmar arrtsülen drugs aser tanga osettem miima shibelenba azüoktsü atema iba lemtet ya agi.

Indo-Myanmar arrtsü ajungalen nungi FMR agienba sülen taruba küm pezü ser tesadang tsüngda arrtsü ajunga atsüdangtsü ta osang ajanga ashi.

Indo-Myanmar arrtsü ya kilometre 1,643 talang lir aser Arunachal Pradesh, Nagaland, Manipur o Mizoram den

arrtsütepa lir.

FMR maparen ya 2018 küm tenzük aser iba ya Centre sorkar Act East policy nung shilem ka lir. India-i ASEAN aser tanga Southeast Asian linüktem den shishilembabaren ajungkettsü atema FMR maparen tenzük.

FMR ajanga India mesüra Myanmar nung tenemlen aliba kintem (kilometre 16 telongtet nung alir) nungi nisungtemi border pass (one year validity) bener international border ajanga senzüteter aser parnoki semdangba shia hopta ana tashi amongtsü akok.

Ungma Imlang nung CCTV Surveillance camera inok



Dimapur, Aenjeti/January 03 (TYO): Nüburtem nem security tajungba agütsütsü aser tajungba nung ketdangsütsü nükjilding nung January 3, 2024 nü Ungma Imlang nung CCTV Surveillance Camera 32 channel NVR 180 Degree inoka Nungshilepden Jamir,

Tatar Chairman, Ungma Village Council ajanga commission asü aser Rev Talijungla, Associate Pastor, UBC ajanga meshiteta sarasademtsü. Iba sentong nung Imlang Tatar Salang nungi council züngsemtem dena liasü. Iba sentong nung A.

Bendang Jamir, Chairman, Arkong Ward, Mokokchung ajanga CCTV aliba tajangzüik aser nüngdakba indang tongmelang agi rasaa ashi. Mokokchung jila kübok CCTV camera tem mezüngbuba Arkong Ward nung inoka liasü.

Manipur nung BSF sepai ka pa sasa khaseta asü

Imphal, Aenjeti/January 03 (Agencies): Border Security Force (BSF) nungi sepai ka Manipur nung Kakching district kübok Sugnu police station kübok khen asoshi amenokba outpost ka nung pa sasa pa indang service rifle agi khaseta ta ashir.

When asoshi amenokba outpost gate nung sentry duty nung lia pa sasa pa indang service rifle agi January 2, 2024 aonung 11:40 ako meta khaseta, ta Manipur police-i ashi.

anepdang 2:00 ako meta süogo ta sangdong.

Iba lendong ya January 2, 2024 aonung atalok, ta Manipur police-i January 3, 2024 nü ashi.

Prangbong ola angashiba sülen par metemertem ola angashileni arsanga ao aser Radeshyam Gujar ya takum (chin) nung injang agi yirur liasü.

Radeshyam Gujar ya Rajasthan nung aliba Nagri yimtsüing nungi liasü.

Asür BSF sepaisang ya arishi küm 41 tain Radeshyam Gujar ta jangjaogo. Pa ya Imphal nungi kilometre 77 shi pilar Serou Mamang Leikai nung Border Security Force (BSF) indang 163 battalion (A coy) den

Pa ya idangjisa anasa aliba Sugnu Public Health Centre (PHC) dangi bener ao aser iba sülen Kakching Bazaar nung aliba Jivan Hospital dangi aben, kong pa January 3, 2024

Bushisüingdangba mapang sepai yagi pa indang service rifle amshia pa takum tembang ta ngutet, ta Manipur police temi ashi.

Pai iba ama mera agiba ya kecha kuli monguteter aser maneni bushisüingdangba mapang lir.

Iba nisungba tasü mang ya tang Imphal nung aliba Jawaharlal Nehru Institute of Medical Sciences (JNIMS) indang mortuary nung yua lir

Assam Rifles temi sentong balala ayongzüka agi

Dimapur, Aenjeti/January 03 (TYO): Assam Rifles temi Chakabama nungi kaketshirtem asoshi Weapon and Equipment Display sentong ka January 3, 2024 nü ayongzüka liasü. Iba sentong nung kaketshir 50 aden, kong kaketshir temi nok-nü aser hadir balala sayuba indang tali metettsü tejangraba liasü.

January 2, 2023 nü Assam Rifles temi Bright Morning Star Children Home, Kohima semdanga yangji aliba tanurtem aser staff tem nem sempet aser nüngdakba oset agüja liasü.

Iba sentong nung New Thewati Middle School nungi kaketshir 50 aser tesayur asem arua shilem agia liasü.

Iba sentong nung Armed forces nung adentsü asoshi scheme balala kaketshir nem angatetdaksü.

Tsürabor maliba tanurtem iba Home nung alir nem tepela aser anisüingzüik bener arutsütsü nükjilding nung Assam Rifles temi iba tesem ya semdanga liasü.

Iba sentong kübok parnok ya Company Commander den anogo ka among aser iba mapang maparen balala nung parnoki shilem agia liasü.

Iba sentong ya ajanga kaketshirtem armed forces nung adentsü asoshi ajungmesoa liasü.

Assam Rifles temi kaketshir aser tesayurtem asoshi "A Day With Company Commander" sentong ka New Thewati COB, Phek nung January 3, 2024 nü ayongzüka liasü.

Iba anogo Jalebi Race, Musical chair aser Blind Hit amala sentong ayongzüka kaketshir ajungai shiem agi aser iba sülen kaketshir ka asoba anogo bilemteta cate lemsa achi.

Sentong tembanga kaketshirtem aser sepaitem külemi chiyongba sülen lokti noksa agia liasü.

DPRO Mokokchung ajanga Metongshitsür

Dimapur, Aenjeti/January 03 (TYO): Mangmetong nung AKM 94 buba Foundation Day among ta sür osang ka December 29, 2023 nü DPRO Mokokchung ajanga sangdongba nung ".... AKM nung mezüngbuba tir

asür Supongnuklu..." ta agüja aliba ya AKM nung mezüngpur asür Supongnuklu ta melenshitsür, ta DPRO Mokokchung ajanga sangdong ka nung ashi. Aibelen asoshi sasa bilemer, ta sangdong ajangasa ashi.

NAP/IRB indang süoshi/osettsüset agütsütsü tender meshir

Dimapur, Aenjeti/January 03 (TYO): Nagaland Police, Nagaland Armed Police (NAP) aser Indian Reserve Battalions (IRB) nem 2022-2023 küm asoshi Clothing/Equipment Items agütsütsü atema 'Sealed tender' meshia Office of the Director General of Police, Nagaland ajanga sangdong ka agütsüogo.

tejangja ya Director General of Police indang office nungi sen 500 agütsür mapa inyakba anogo mashi nung 06/01/2024 nungi tenzüka meshitettsü, ta sangdong ajanga ashi.

Jangra alirtemi iba sangdong

Tender ya 05/02/2024 anüingdang 12:00 ako tashi agizütsü aser tender agütsür lia kasa anogo nikongdang 1:00 ako nung lapoktsü, ta sangdong ajangasa ashi.

Assam nung sen crore 4.2 jenjang heroin apu



Silchar, Aenjeti/January 03 (Agencies): Assam kübok Cachar district nung aliba police temi sen crore 4.2 jenjang heroin talep ka January 3, 2024 nü pua liasü.

Iba miim mozü ya kidangi state ka nungi Assam-i bener arua liasü, ta osang ajanga ashir.

Iba osang ya Assam Chief Minister Himanta Biswa Sarma-ia jangjatsüogo.

Assam kübok Cachar district nung aliba police temi heroin tuozük grams 600 apu aser iba miim mozü dak sendakba nung nisung ana pua lir.

NSCN/GPRN (Akato Chophi) ajanga asükhu lemsatep

Dimapur, Aenjeti/January 03 (TYO): NSCN/GPRN-R (Akato Chophi) indang MIP sangdong ka ajanga ashiba agi, December 30, 2023 nü Yehemi yimtsüing nungi asür Nizukhu Chophi'er jabaso deputy C-In-C, Maj.Gen. Hukato Chophi asüba asoshi mangyim tejashi den asükhu lemsateper.

Asür Chophi ya February 17, 2022 nung aso aser 1992 küm Naga National Movement nung tenüing süluoka küm 30 dak tema linük tenzüka Naga nunger temeden tasü ita ochiba nung tenzüka liasü, ta sangdong ajanga ashi.

Asür Chophi ya temulung taroktiba nungi linük meimer ka ama külem tenzüker dang pa yimya aser mapa agi sayutetogo.

Pa tanüla teti tatem maka tesunep nung anisüingzüik aser par kinunger aser tembartem mangyimba mapang Tajung Tsüngremi anisüingzüik agüjang ta sarasademtsür, ta NSCN/GPRN sangdong ajanga ashi.



बैंक ऑफ बड़ोदा
Bank of Baroda

KOHIMA BRANCH
Main Bazar Road, Near Old Taxi Stand, Kohima- 797001
Email: Kohima@bankofbaroda.co.in

Kiojen ayoktsü atema Sale Notice
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Rule 6 (2) & 8 (6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice.

Public asertalisa sen apur(tem), Mortgagor (tem) aser Guarantor (tem) nem iba sangdong agütsür, Secured Creditor dang mortgage/charge asüba tsünglanglen shia aliba kiojen Bank of Baroda nung Authorized Officer agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" tsünglanglen shia aliba account/s nungi sentsüh alangzüksü atema ayoktsü. Sen apur(tem)/Mortgagor (tem)/Guarantor(tem)/alangzüka aliba kiojentem/sentsüh/Reserve Price/e-Auction anogo aser mapang, EMD aser Bid Increase Amount tsünglanglen metetdaksür-

Sl/ Lot No.	Name & address of Borrower/s / Guarantor/ Mortgagors	Short description of the immovable property	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	Mr. Hyungwalo Jeshing Rengma, R/o- H. No. E/A-1/01, Agri Colony, Opp. Stella Higher Secondary School, Kohima, 797001, Mr. Kewetso Mero (Guarantor) New Minister Hill, Kohima- 797001.	Land and building measuring 1500 Sq.ft covered by Patta No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. Bounded : On the North by: Property of Seyiekhoh Angami, On the South by: Property of Hyungwalo Jeshing, On the East by: Nullah, On the West by: Property of Seyiekhoh Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: 20.01.2024, Start Time: 01.00 pm End Time: 03.00 pm	1. Reserve Price: Rs. 3,51,00,000.00 2. Earnest Money Deposit: Rs. 35,10,000.00 3. Bid Increase Amount: Rs. 10,000/-	Physical Possession	17.01.2024 at 1.30 P.M.

Iba kiojen ayoktsü telatetbatem tejangja metetpelatsü atema yimlibilema website link <https://www.bankofbaroda.in/e-auction.htm> and <https://ibapi.in> nung repringang. Iba dak alia bid asütsüpertemi Authorised Officer den Mobile No: 81199 22922 ajanga tongtepretepsü akok.

Mr. K H Zhimo
Authorised Officer
Bank of Baroda

Date: 04.01.2024
Place: Kohima



January 03, 2024 nü Thiruvananthapuram nung Kerala Chief Minister, Pinarayi Vijayan-i Christmas-New Year nungtem nung ayongzükba sentong ka nung tangokba noksa nung angur.

Lok Sabha elections matongdang CAA ozüngtem sangdongtsü

New Delhi, Aenjeti/January 03 (Agencies): Citizenship Amendment Act, 2019 ozüngtem renemogo aser Lok Sabha election matongdangsa item ozüng sangdongtsü, ta sorkar tongti ketdangser kati metetdaksü.

CAA ajanga Pakistan, Bangladesh aser Afghanistan nung reshikangshi ajanga India-i arua jenoka alir minorities nem India senso agütsüsü.

CAA kübok senso agütsüsü atema application densema maparen balala asoshi online ajanga inyaksü atema home ministry-i inyakdar, ta ketdangserisa metetdaksü.

CAA ya 2019 küm December ita nung Parliament nung agizüka liasü aser 2020 küm January 10 nungi benoker, saka tang tashi CAA ozüngtem mesangdong, ibayongji Pakistan, Bangladesh aser Afghanistan nung reshikangshi ajanga India nung jenoka alir Hindu, Sikh, Jain, Khristan, Buddhist aser Parsis nunger

nem senso agütsüsü atema tang tashi maparen metenzük. Item linük asem nungjagi reshikangshi ajanga 2014 küm December 31 anogo tashi nung India nung jenoka alirtem nem ang India senso agütsüsü.

CAA agizükba mapang linük nung Muslim nungertem aser opposition party temi, iba ozüng ya agientsüla, kechiyong iba ozüng ajanga yimsü nung ajemdaker nisung bendangshidanga züngshir, ta takhangba agüja liasü.

CAA ozüng tang tashi mebenokba ya coronavirus wara ajanga liasü, ta Centre-i ashir.

Lok Sabha elections agütsüsü atema anogotem mesangdongdangyongi CAA ozüngtem sangdongtsü asü? ta asüngdangba langzüdang sorkar ketdangseri jagi, "Au, ibaji masüadang sangdongtsü," ta metetdaksü.

Paisa, "Ozüngtem renema dang lir aser online portal-a renema lir. Inyakyim ajakji

online ajanga dang asütsü. Temepishiba agütsürtemi parnoki travel documents mebeni India tonga aruba anogo/küm sangdongtsü. Temepishiba agütsürtem dang document kecha memeshitsü. Linük senso meshia application agüja alirtemi application tasen agütsüsü menüngdak," ta metetdaksü.

Temsüa aliba bendangertem jagi CAA kübok home ministry indang portal ka ajanga temepishiba agütsüsü; parnoki mobile phones ajanga application agütsüsü akok.

December 27, 2023 nü Kolkata nung BJP senden ka nung jembidang Union home minister, Amit Shah-i, CAA ya shingaiya nokdangtsü makok, kechiyong iba ya linük ozüng lir, ta jembia liasü.

Yaküm November ita nung junior home minister Ajay Mishra-ia, March 30, 2024 tashi nungbo CAA ozüngtem ya mapa küma benoktsü, ta metetdakja liasü.

India nung tang Coronavirus agi teshirangdakpur 4,440 kümogo

New Delhi, January 03 (Agencies): Tesüiba ghonda 24 tsüngda India nung coronavirus agi shiranger nisung pongu süogo aser nisung 602 dak iba tashidak putetogo.

Tang linük nung iba tashidak agi teshirangdakpur 4,440 jungogo, ta Bodhbarnü Union health ministry-i metetdaksü.

Tesüiba ghonda 24 tsüngda Kerala nung iba tashidak agi shiranger nisung ana asü aser Karnataka, Punjab, Tamil Nadu nunga nisung kaka asü.

Kerala nung coronavirus agi

asür tambur kabo temesen tashidak den multiple organ disfunction syndrome aser sepsis-a liasü aser coronavirus agi asür tantsür ka coronary artery tashidak den sepsis-a liasü, ta health ministry-i metetdaksü.

December 5, 2023 tashi nung anogo shia Covid putetba tajemba kümer liasü, ajisüaka variant tasen ka putetba den külemi asükwa mongpu ajanga ano maneni anogo shia covid teimba dang puteta arudar.

2020 küm tetenzüklen

Coronavirus wara tamajungtiba mapang nung anogo shia India nung nisung lakh aika dak iba tashidak puteta liasü. Küm pezü tsüngda India nung coronavirus tashidak agi nisung lakh 5.3 dak tema süogo.

Linük nung iba tashidak agi shiranger crore 4.4 anepadokogo aser ibaji iba tashidak agi shiranger shilem 98.81 anepba lir, ta health ministry-i metetdaksü.

Tang tashi nung linük nung coronavirus vaccine dose crore 220.67 agütsüogo.

EAM Jaishankar-i January 4-5 anogotem nung Nepal semdangtsü

New Delhi, January 03 (Agencies): External Affairs Minister, S Jaishankar-i January 4-5 anogotem nung Nepal linük semdangtsü, aser iba mapang nungji pai linük ana tsüngda tesendaktep tashi itshitsü atema jembitsü.

Ministry of External Affairs (MEA)-i, Jaishankar aser Nepal Foreign Minister, N P Saud na leniba nung India-Nepal Joint

Commission senden amentsü, ta metetdaksü.

"Foreign Minister of Nepal, NP Saud-i jaokba nung ajemdaker External Affairs Minister S Jaishankar-i January 4-5 anogotem nung Kathmandu semdangtsü aser tena lenisüba nung 7buba India-Nepal Joint Commission senden amentsü," ta MEA-i metetdaksü.

India-Nepal Joint

Commission ya 1987 küm tenzüka liasü aser iba sabang kübok linük anati lenla balala nung tesendaktep jenjang asadanger.

Jaishankar-isa Nepal nung tongti ketdangsertem aika ajurutsü.

"'Neighbourhood First' policy kübok India atema Nepal ya tongtibang partner ka lir," ta MEA-isa metetdaksü.

Konang Naroküm Sobuteter Tushir

Obu Imertetba semchir Pongener Ungma Imlang nungi wabong Merenkaba Pongener aser Watsü Supongsangla Longkumsür na jala Kongro Temjennaro Pongentsür Associate Pastor Old Cambridge Baptist Church Boston Massachusetts, USA nung Sannükba temelaba kulizüng agutsür inyaka lia, la ano tenzüka mapa nung tematiba mapa pongloksü-a Kongro Temjennaro 17 December, 2023 anogo nung mezüja shim (Ordained). La dang tang nungi Rev Temjennaro ta ajatsü.

Dr & Mrs Clark-i asen Naga tenem nung Yisu Osang Tajung proka yutsüba iba sungjang tanü asen Naga lima nung dang masü saka America lima tashi or Tsüngremi apuoktsüba o, tanela temeshi leniba kübok asen Tenyanglur Tematiba Tsüngremi tenya mapa inyak nung, "Lan liya, kilir tajung" ta ashitsü Tsüngrem tauchi agi aniang ni, ta asen oboula Imertetba semchir kidong aser Illangstsür Sarasadem.

Anungla *EKumsangla*
ANUNGLA PONGENTSÜR EKUMSANGLA PONGENTSÜR

75 Azadi Ka Amrit Mahotsav **पावरग्रिड POWERGRID**

NOTICE

- North Eastern Region Strengthening Scheme-X*** Project kübok Roing (PG) aser - Chapakhowa (AEGCL) end nung 132 kV D/C Roing (PG) - Chapakhowa (AEGCL) Transmission Line den associated line bays atema Actual DOCO nungi 31-03-2024 atema determination of Transmission Tariff asoshi CERC (Conduct of Business) Regulations'1999 indang regulation-86 aser CERC (Terms and Conditions of Tariff) Regulations' 2019 kübok approval.
- Temalen shia aliba Transmission system nungi beneficiaries ji: (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board

Tariff details:

Name of the Asset	Asset-1
Schedule DOCO (FR)	02.03.2022
DOCO (Actual)	10.07.2022
Estimated Completion Cost (Rs in Lakhs)	5785.70
Tariff for year 2019-24 (Rs in Lakhs)	
2019-20	-
2020-21	-
2021-22	-
2022-23	-
2023-24	716.58

- Determination of tariff atema yangluba application copy ka applicant indang website www.powergridindia.com nung angutsü.
- Application nung aliba determination of tariff proposals dak sendakba nung tebilemba mesüra tashishba kar danga lira iba notice agütsüba sülen anogo 30 tsüngda beneficiary mesüra nisung mashie kati Secretary, Central Electricity Regulatory Commission, 3 & 4th floor, Chandralok Building, Janpath, New Delhi - 110 001 matsüngdang (mesüra Commission indang office aliba address nung) benokang aser corporate indang office address ajanga applicant nem-a copy ka agüjang.

Place : Gurgaon Sd/-
Date : 27.12.2023 Sr.GM (Commercial)

POWER GRID CORPORATION OF INDIA LIMITED
(A Government of India Enterprise)
Corp. Office : "Saudamini", Plot No. 2, Sector-29, Gurugram-122001, (Haryana) Tel. : 0124-2571700-719
Reg. Office : B-9, Qutab Institutional Area, Katwaria Sarai, New Delhi-110 016. Tel : 011-26560112, 26560121
www.powergrid.in, CIN : L40101DL1989GOI038121

A Maharatna PSU

INDIA teloktep nung Convenor ji Bihar CM Kumar shimtsüa akok

New Delhi, January 03

(Agencies): Congress party tongtepretepar. Congress-i INDIA teloktep teyari ajanga Opposition nung Kumar Convenor shimtsü INDIA teloktep nung atema yaritsü, ta shiogo aser Convenor ji Janata Dal tanga party tem nungi lenirtem (United) Tir aser Bihar Chief danga Kumar pusemstsü Minister, Nitish Kumar mepishidar.

shimtsüa akok, ta osang ka ajanga metetdaksü. Congress densema opposition party aikati INDIA teloktep nung convenor ji Bihar Chief Minister Nitish Kumar sädaksütsü melunga lir, ta JD(U)-i metetdaksü.

January 14 nungi Congress lenir, Rahul Gandhi-i Manipur nungi Mumbai tashi 'Bharat Nyaya Yatra' agütsü lia Indian National Developmental Inclusive Alliance (INDIA)-i tongtibang telemtetba aika agütsü tebilemba lir.

INDIA teloktepi Kumar convenor shimtsüa akok aser Bihar o Maharashtra na densema tongtibang state aika nung opposition party tem tsüngda menden lemsatsü imlar.

Taoba hopta JD(U)-i Nitish Kumar party Tir shima liasü; iba mapang nungjagi tenzüka Congress nung bangdak lenirtemi pa den

atema yaritsü, ta shiogo aser nung Kumar Convenor shimtsü INDIA teloktep nung atema yaritsü, ta shiogo aser nung Kumar Convenor shimtsü INDIA teloktep nung atema yaritsü, ta shiogo aser nung Kumar Convenor shimtsü

2024 küm Lok Sabha election nung BJP-i aniba NDA anema longjemer tokteptsü atema opposition teloktep ka tentettsü asoshi yaküm February ita nungi Bihar Chief Minister-i tongti shilem agia liasü, aser ibaji opposition lenirtemi meteta dang lir.

Yaküm February 18 nü Bihar yimtiba, Patna nung Communist Party of India (Marxist-Leninist) senden amendang Nitish Kumar aser Congress lenir nati 2024 Lok Sabha election atema opposition longjemtsü atema benoka liasü. Iba sülen June ita nung opposition party balala nungi lenirtem Patna nung mezüngbuba senden mena liasü.

Ano külen tanga osang ka nung, Congress alliance committee-i Maharashtra aser Bihar na nung party tem tsüngda menden lemsatsü atema inyakdar.



TIR YIMYIM YIMOBILEM (EDITORIAL)

DIMAPUR YANGTEPNÜ, JANUARY (AENJETI) 04, 2024

2024 Senso Candidate !

2024 küm ya India asoshi Lok Sabha tatar hoho nung amentsü atema tatar 543 shimtsü asoshi election agiba küm ka lir. Iba election ya iba küm tasen nung April aser May na tsungda agitsü, anungji jokorla yimten teloktembo iba election atema sentong yanglu tenzükogo. Item tatar 543 rongnung Nagaland nungia tatar ka yoktsü atema election agitsü. Atangji, iba Lok Sabha election yabo assembly general election amabo masü, kechiyong Nagaland nung assembly constituency 60 agi parliamentary constituency ka dang akümtsü, anungji nübortem aikati candidate nem masü saka party nem dang agütsütsü. Ashiko, assembly election masüyonga, yimya sübar asünungji, kari kar peladaksüba agi kar ajanzüktsü atema yim kar nungbo 'Senso Candidate' shimtsüa akok. Ibaji atema tang yongi karbo sentong yanglua alitsü akok. Iba ama sentong jagi yimtaklirtemibo candidate tejak mangu aser memetet ser telok o telok na tepteptsüa akok aser karbo senso nungia jentoktsü kecha meteta maka. Asenok asoshi election aruba ya junger, kechiyong asenok atema jembitsü aser inyaksütsü atema yimsüsür shimtsü maongka angr. Ajisüaka, senso ka yimten nung yimsüsür shimtsü temeten aser maongka anguba agi yimtak lendong aser atakatem jaoktsüsa asenoki inyaktetba mapa kaji 'senso candidate' shimba ya asütsü. Senso candidate shimba tangatetba aser nükjidongji yim ka tzüa masen zep ta ka kuma longjemer candidate ka yaritsü longjemba mapa ka lir. Yimya agi iba senso candidate-ji pei yimer asütsü, kechiyong yimer MLA aküm nung dang yimer ajanzüktsü ta asenoki asenoksasa ilaa bilemer. Aji oda, senso candidate shimbaji yimer longjemdak akümer. Ajisüaka, senso candidate shimba ajanga atalokba mapatem reprangdangra, senso candidate shimba ajanga yimer longjemer masü saka yimer rongnung meputep aser tsükchitep tali adokdaksür. Yimer longjemba tenung nung senso candidate shim asünungji nisung kar aridoker, kar ki shibanga yutsür aser kar kibo raksatsür adoktsüa akok. Ano, yim kar nungbo senso candidate shimtsü aser election nung adokdaksütsü atema azü poka rarateper külenang senso candidate-ji shimtettetsüa akok. Iba jagi senso longjemdaksür asü piladaksü-ar asenoki angatetsü. Aji oda, mapang ka nungbo Nagaland Legislative Assembly nung amener asenok tatartembo yimten teloktem nungi masü saka ajak senso candidate-tem dang asütsüa akok. Iba jagi asenok kolok aser tangatetba iladaksür, kechiyong senso candidate-ji party candidate masü aser constituency candidate-a masü, saka asen yimer senso candidate, anungji asen yimer senso mungdang nung mendenbuba asütsü shimer amai asenoki bilemer aser candidate jagia asen yimtak MLA inyaksü amai bilema alitsü. Aji oda, senso candidate asünungji, asen candidate aser MLA-ji linük temzüng agi masü yimer senso temzüng agi alener. Iba jagi senso candidate-i terenlok mapa inyaksübaren nunga pei yim alema oagi mangur. Ibayongji, teshimbo yimsüsür asütsü shim ser nung senso candidate-sang to senso-a memesük pi lar kümer ola madoktet meshimetsülen senzüa ajurutsü. Aji oda, asenok asoshi senso candidate shimba ya tajung tazü masü, iba yagi yimti nung nübo tajunga lir ser nung sen dang masü süng long aser injang ajak amshia pi rongi yoktsülabo masü ka shimer yoker. Asenoki tajunga ta bilemer saka asenok lujen aluba ya senso candidate shimba anogo nungi tenzüka ta asenoki angatetsü. Aji oda, asenoki sütepa-kutepa shimba senso candidate sang toa asenok senso ajak longjemer meshimetsür aser sentsütsür kümdaksür. Aji asenok sensosanger ajak longjemer inyaktetba mapa ka lir. Aji asenok atema takok asü tamakok asütsü ? Tanü asen lima nung senso candidate shimba maparen ya yimsüsür shimba mapa ka masü atakatem shimtetba mapa ka kümogo. Sensosanger mapa tajung asoshi longjembaji junger saka nisung kar tepseta endoker külenang mesüra kar senso nungi jentoker külenang mesüra kar yimtak nungi aridoker külenang longjemba telongjem yabo temoatsü masü atakatem lir. Joko, iba atakatem ya asen lima nung ojang jaoktsüla. Iba atakatem yagi asenok MLA masü alar aser Suwar kümogo.

OLEMSABANG

Indonesia lima nung Christmas

~ Amenla Mar, Indonesia



Yimdong sua Christmas carol aoba noksa yangi angr.

Tepela Küm tasen Salem ajak dangi abener.

Indonesia lima yatanga lima dang nungi kenyongi balaka lir. Iba linuk nung Island 17,000 dak tema lir. Tanu tashi nung Island 6000 shi nungdang meimchieremi metet aser item rongnung island ishika nung dang nisungtem lidagi. Tongtipang Major island-tem kong nisungtem alir itemji; Kalimantan, Jawa, Sulawesi, Sumatra aser Papua Island-tem lir. Iba dak alaka island tilatemji world nung tongtibang International tourist destination lir. Item island tem reprangi alima kin balala nungi linuk penzur aruba ajanga parnok rongsen leman ajungketsur. Item island temji Bali, Karimunjawa, Gili, aser Lombok lir.

Indonesia lima ya temeyokteb sobaliba lima asunung yangi 300 ethnic tribe lir aser tribes ajungai pei tetsu oshi jembir. Oshi ajak agi 350 dak tali lir. Government ajanga ajaki jembitetsu aser angatetsu asoshi national oshi ka yanglutet iba dang 'Bahasa Indonesia'ta ajar. Ibai official oshi amshia arudagi. Tenung agi Indonesia sensopur ta saka parnok leman aisu nung island ka nungi island ka sobaliba kenyongi balala Tat; Oshi, kenten menu, tsungsangba, tamangba yimsü, achiajemba, subusulemtsu, culture and practices etc etc balala lir. Arogotem nunga tekulemba yimyatem aser inyakyimtem Arogo shiaa balala lir. Indonesia lima nung Government recognized asuba tamangba yimsü terok lir; Islam, Protestant, Catholic, Hindu, Buddhis aser Kong Hu Cu. Tanu tashi yimsü kati den tesendaktep tajung nung lia arudagi.

Indonesia lima nung asenok Khristan(protestant)population 7.43 % lir. Muslim yimsü ainba memenebaka tanga yimsü tilatem(minor religion) rongnungbo asenok protestant yimsü kanga kera ainba survey report nung angutsu. Khristantem rongnung tamangba yimsüren kodang repangdangdir denominations aika tenteta lir. Asenok Baptist arogo denatanga Christian tamangba arogo nungja aika kubok arogo tilalatem(house church)tenteter lir. Item arogotem indang oda kulemmetemetem den jembidang aser tajangshiba kaji Arogo shia method of worship aser inyakyim tera balala lir. General nung arogotemji classify sura tongtipang group ana lemdangtsu akok; Evangelical churches, Charismatic churches. Evangelical churches-ji teimba parnok culture den kulemi Christian tekulem aser arogo inyakyim balala amshia amanger tat; Government holiday-tem, par tetsü tebu among tsumong tem ji sentep nung Khristan tamangba yimsü den meyokteber (Indigenous worship)kulema arogopurtemi amonger. Indonesia Independence day, Pancasila day aser linuk asoshi bendanga agutsuba linertem asoba anogotem ama etc, etc. Sentep kidang kanga metsunga ret reta amangbapur shiapar cultural dress semer, National Flagamer march sua, pei linuk meimba ken tena tutushi aguja kulemer. Item sentep nung tiembaka parnok local native oshi agi Lai zunga ken tena kulemer. Yamaji Christmas amongba yimya par culture den kulemi meyokteba amonger. Temalen ashiba ama Indonesia lima ya Island balala aliba amaji parnok culture aser inyakyima balala lir. Taoba ita nung onok alidakcentral Java nung Christmas koda among kar lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NACRYF-i 6buba Music Festival January 7 nü ayongzüker



January 03, 2024 nü Kohima nung osangbenertem senden ka nung Northern Angami Christian Revival Youth Fellowship (NACRYF) Music Festival ayongertem tangokba noksa nung angur.

Kohima, January 03 (TYO): Northern Angami Christian Revival Youth Fellowship (NACRYF) 6buba triennial Music Festival January 7 nü Capital Cultural Hall, Kohima nung ayongzüker, ta Bodhbarnü Organizing Committee-i osangbenertem senden ka nung metetdaksü. Music festival ya Christian Revival Church, Kohima Village-i ayongzüker. January 3 nü osangbenertem senden ka nung

jembidang NACRYF Tir, Pelevotuo Solo-i, "Kentenmenü ajanga lanurtem tanela asentenshitsütsü onoki yongyar," ta metetdaksü. Iba Music Festival nung Northern Angami region kübok Christian Revival Church 28-i shilem agitsü aser lanur 1,500 shi adenshia osangtajung kentem atentsü, ta pai ashi. Anepdang sentongji 9:30 ako nungi tenzüksü aser nikongdang sentongji 2:00 ako nung tenzüksü aser sentong

anapronglaji NACRYF Youtube blog nung live sayutsü, ta paisa metetdaksü. Event Show Director, Khriezo Suokhrie-i iba sentong nung adentsü jangrar ajak pelashishia jaoker, ta metetdaksü. Osangbenertem senden nungjisa Organizing committee zungsem Situo Kelio, Music secretary NACRYF Zapu Mere aser Organizing Committee Convenor, Kethosetuo Sachii nungera liasü.

2023 küm alima tesem balala nung Catholic missionary 20 tepset

January 03, 2024: 2023 küm alima tesem balala nung Catholic missionary 20 tepsetogo aser parnok teimbaka rara aliba tesemtem nung liasü, ta Vatican nungi osang ka ajanga metetdaksü. "Parnoki tanga tesemia oteta liasü, mesüra Khristan tenyaba wadang toktsüteta liasü mesüra parnok sasa taküm kümzüksüsa liasü, ajisüaka parnoki yamaji meinyak. Parnoki tensa majungbaji meteta dang liasü aser anogo shia parnoki lendong ajurutsüsa alibaji parnoki meteta dang liasü," ta kasa report ajanga metetdaksü. Vatican nung Pontifical Mission Societies indang news

agency Fides-i, 2023 küm pastoral workers 20 tepset aser parnok rongnung bishop ka, putir ti, religious brothers ana, seminarian ka, novice ka aser laypeople tenet liasü, ta metetdaksü. 2022 küm nunga alima nung Catholic missionary 18 tepseta liasü. 2023 tepsetba missionary tem rongnung Los Angeles nung Auxiliary Bishop, David G. O'Connell densema liasü. Pa ya Ireland nungi lir aser pa arrshi küm 45 dang liasü. Pai Interdiocesan Immigration Task Force tenteta liasü. David ya 2023 küm February 18 nü par kidang sür lia angu aser pa temang nung injang zübo aika liasü.

2023 küm tepsetba missionary tem rongnung U.S nung putir Stephen J. Gutgsell densema liasü. December 10, 2023 nü Fort Calhoun, Nebraska nung nisung kari pa tsüngseter lia angu. Yaküm missionary tem teimba tepsetba linükji Africa liasü. 2023 küm Africa nung missionary 9 tepset aser America nunga missionary trok tepset. Europe nunga missionary ka tepset. 2023 küm January 25 nü Morocco nung kati arrshi küm 65 missionary, Diego Valencia tepseta liasü. Kasa aonungji arrshi küm 74 putir, Antonio Rodríguez nok agi yiruja liasü.

Indonesia nung lendong atalokba sülen Arogoi timtemertem yarir

January 03, 2024: New Year anogo nung Indonesia nung volcano lendong atalokba sülen Flores asetkong nung aliba Arogotemi iba lendong agi kongshirtem yaridar. January 1, 2024 anepdang Lewotobi Laki-laki volcano jatetba lendong atalokba sülen East Flores Regency kübok yimtsüng trok nungi nisung 2,400 shi jenshir temporary shelters 11 nung jenoka lir, ta

sorkari metetdaksü. Larantuka Diocese nung Bishop, Fransiskus Kopong Kung-i social service agency Caritas dang tekaraba nung timtemertem yariang, ta tuyua liasü. Caritas coordinator, Marianus Dewantoro-i, "January 3 anogo tashi nung onoki parnok nem pakti 150, mask 1,100, tzü aser antzü agütsüogo; ano maneni taruba

anogotem nunga Arogoi teyari agütsütsü," ta metetdaksü. Welan-isa, parnoki chipo-aonpo, süng tatsüksü, masks, yipten sü, sanitary napkins, tarpaulins aser kinü tanurtem atema chiyungtsü nungdaker, ta ashi. December 12 nungi tenzüka tang tashi nung Mount Lewotobi Laki-laki nung volcano lendong ponguben atalokogo.

ANO GO ABEN TSÜNGREM DEN

Tesendaktep

1 Tesa. 4: 1-8

Aser tena prongla mangsa liasü, nisung o pa kinüngtsü na, aser maktepi liasü. Lipok 2:25.

Laishiba nung iba o jakdaka dang ashiba jagi Tsüngremi atsü-abung medembaji Tsüngremi saklokba mapa ta sayur. Pai ibaji yanglu. Idakji kecha tamajung mali. Adam aser Eva mangsa liasü saka kecha maktepi liasü. Temenen malidanga, atsü-abung medembaji liasü. Tsüngremia ibaji junger ta ashi. Ibai taaktsü o ka masü.

Ano item O yagi satitsü atema Tsüngremi atsü-abung medembaji yanglu ta sayur. "Anungji nisungi pei tebu aser pei tetsü toktsür, pei kinüngtsü den sentepa alitsü; aser tena shi ka dang alitsü" (Lipok 2:24). Iba telungjem nem Teyanglur -Tsüngremi ozüng aser temoatsü agütsü. "Aser Tsüngremi parnok moatsü aser Tsüngremi parnok dang ashi, "Soyapokyang, aser jenti renang, aser alima süngdakja aji azüokang" (Lipok 1:28).

Atsü-abung medemba sempet ajanga Tsüngremi meimchir taküm tasen yanglutsü agütsü. Satiba kübok tepela aser jangratema shilem agitsü Teyangluri Pa shisatsü nung iba nungdak yayanglu. Asenok temenen nung tsükba ajanga atsü-abung medembaji menena kümdaktsü. Saka asenoki Pa sempet tajung mejungi amshiba temenen asoshia Yisu kangki nung asü.

Temeim Kibur, onok tebur aser tetsür yangluba asoshi Ne tenüng asanger. Iba atsü-abung medemba senti sempet Nai mulungba nung amshitsü onok dang yariang; Yisu tenüng nung. Amen.

Khristmas mapang Nigeria nung Khristan 200 shi tepsetogo

January 03, 2024: Khristmas mapang Nigeria nung Khristan 161 tepset Fulani telok balalai Bokkos, Barkin Ladi, aser Mangu counties kübok Khristan yim 21 amakba mapang nung Khristan International Christian Concern (ICC)-i metetdaksü.

Nigerian Red Cross-ibo, Khristan mapang Plateau state nung Khristan 161 tepset aser nisung 29,350 shi jenshiogo, ta metetdaksü. Red Cross-isa, kiralongrartemi amakdang nisung 301 yiru aser ki 27 rondoktsü, ta metetdaksü.

Khristmas mapang asürtemji iba dang nungjagi teimba asütsüa akok, kechiyong kiralongrartemi amakba mapang jenshirtem aika samaogo, ta ketdangsertemi metetdaksü. Plateau State Commissioner of Information & Communication Hon. Musa Ashoms-i, Khristmas mapang nung Khristan 195 tepsetogo aser yimdaklirtem aika samar mangur, ta metetdaksü.

Irigwe Youth Development Association Tir, Ezekiel Peter Bini Condole-i Nigeria Tir, Bola Tinubu dang linük nung Khristanem kümzüksü atema nendaka inyakdaksüner aser sorkari Plateau State nung takoksa angur Khristan kibongtem nem senotsü teyari agütsüdaksüner, ta mepishiogo.

Commissioner-isa yimdaklirtem dang nenok sasa pei taküm kümzüksü atema inyakang aser nungdak dang süra raraba hadir-a amshiang, ta metetdaksü.

Condole-isa US Tir, Joe Biden danga Nigeria nung Khristanem kümzüksü atema Nigeria nung lenirtem ajungshitsüla, ta mepishiogo. Küm shia alima nung Khristanem teimtiba tepsetba linükji Nigeria lir, ta International Christian Concern (ICC)-i metetdaksü.

Amnesty International Nigeria-ia report ka ajanga, Khristmas mapang nung Nigeria kübok Plateau state nung Khristan 194 tepsetogo, ta metetdaksü.

Tesüiba küm 20 tsüngda Nigeria kübok Middle Belt region nung Khristan 50,000 dak tema tepsetogo aser nisung million aika jenshiogo.

AO OSHI ANGAZÜKDAK:

TANÜ ANGAZÜKTSÜBA OJANG



Shimshi

(v) tanaben tenüngteta agiba (reappointed)

* Kaketshirtemi Manenba tir asütsü atema shimshi.

Shimshira

(v) nüngdak balala asoshi bushia shimba mapa (selection)

* Lokti tenzüker shimshiraba mapa nung kümdanga inyaktsüla.

OLONG PAITEP # 6656

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

- 2. Auo nung chiyongtsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A ___ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # 6655 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

NAI-A YA METETTER MA



2023 küm Guwahati nung aliba Lokapriya Gopinath Bordoloi International (LGBI) Airport nungi passengers lakh 56 apusoa ogo. Tesüba kümtem dang nungi 2023 küm LGBI airport nung passengers lakh 10 agi teimba liasü. Maneni 2023 küm LGBI airport ajanga tangalen nungi aruba passengers lakh 55.9 tema adena senzü.

Tripura BJP-i IS elections atema renemshir

Agartala, January 3, 2024 (Agencies): BJP Tripura unit-i Lok Sabha elections atema maparen tenzüko.

January 3 nü Tripura BJP-i senden ka amen aser idangji BJP central committee-i sentong renembatem lemsatep.

Tripura nung Lok Sabha constituency ana lir- East Tripura aser West Tripura.

Tripura chief minister Dr Manik Saha menden ser Agartala nung aliba Sahid Bhagat Singh Yuba Abas nung senden amen. Idangji BJP state president Rajib Bhattacharya, taoba deputy CM Jishnu Dev Varma aser general secretary (organization - Tripura and Assam) Ravindra Raju nunger aden.

Senden nung Tripura BJP president Rajib Bhattacharya-i Lok Sabha elections atema temulung agütsütsü nenshia jemi.

"Onoki Lok Sabha elections nung rangloker senden ka ayonga amen. Senden nung onoki election atema asalentongtem renem aser züngsemtem den lennirtem nem shisatsü agütsü. Iba mapang onoki election tebilembatem lemsatep" ta Bhattacharya-i ashi.

"Narendra Modi maneni Prime Minister shimtsü atema shilem agitsü onoki party züngsemtem ayongzük" ta paisa ashi.

"Onoki Central BJP team indang lemtetem metetdaksü aser Narendra Modi maneni Prime Minister inyakdaksütsü atema Tripura nungi MP menden anaprong nungi BJP candidate tem takok ngudaksütsü jemi" ta Bhattacharya-isa metetdaksü.

"Election agitsü mapang tonga arudang lennirtem aser züngsemtem olemtepogo. Ram Mandir, election aser tanga onüktem onoki lemsatep" ta Tripura deputy chief minister Jishnu Dev Varma-i ashi.

PELABA LEMSATEPER



(7th July 1984 - 23rd December 2023)

Onoki teti meima aliba temeim asür **Lanutemsu** (Changtongya) ajungbena akümüli wadang tembanger onok mulung zürepa nung alidang shirnokisa sarasadem, nübu, rongsen agi onok dang meima yariogo, nenok ajak dang kinungertemi kanga pelaba lemsateper.

Nenok temeim mapatem asoshi pelar aser tulusang Tsüngremi nenok ajak talubosa moajang ta onoki sarasademtsür.

~ Temeim Tsürabur & kinungertem.

PELABA LEMSATEPER



(1933 - 18/12/2023)

Onoki teti meima aliba temeim tsürabur **Rev. I. Tinu**, Ex Pastor (Yaongyimsen) mapang tatsüka manemi lir, iba akümlir wadang temer 18th December 2023 anogo teti anisüngzük limaigo.

Onok mangyim tia nung alidang kija, kibong, ABAM, Arogotem, yimer yimsanger, adianutem aser tembartem shirnokisa tamang sarasadem den nübu rongsen agi nongitba yaritepogo nenok ajak dang kangasa pelaba iba osang ajanga lemsateper.

Nenok aria bilemba temeim mapa tajung asoshi asen tulusang Tsüngremi maneni moajang ta onok sarasadem.

~ Temeim kinungtsü, chirnurtem aser kinungertem.



Hindustan Petroleum Corporation Limited, Aketa Maharatna Company laga naam para appoint kuribole mon para janai di ase-Coolants, Brake Oils aru Greases karne Developer Channel Partner.

Aru details pabole, please para jai gena moi khan laga website visit kuribi <https://www.hplubricants.in>, tade path follow kuribi **Lube Distributor**—**Become-A-Developer**—**FOR COOLANTS, BRAKE OILS AND GREASES**. Selection karne **Guidelines** aru **Application form** khan website teh upload kuri gena ase.

Application fee nathakibo. Application form filled kuria logo, lagia attachments nahoile documents khan milai gena post para Sri Bibhu Ranjan Das, Sr Manager Lubes, Hindustan Petroleum Corporation Ltd., Kolkata Lube Regional Office, 14th Floor, NBCC Square, Akandakeshari, New Town, West Bengal 700135 teh pathabo paribo. Application Form/s aru lagia documents khan **January 16, 2024 tarikh laga 17:00 hours (5:00 PM)** teh nahoile aghe teh punchi bole lagibo.

Akoi queries nahoile information lagile, applicant para Sri Bibhu Ranjan Das, Sr Manager Lubes ke likhi bole paribo, Mob no ase **8349996458**, aru Email ID ase **bibhudas@hpcl.in**

INDIA LAGA SOBSE DANGOR LUBE MARKETER



Assam sorkari Orunodoi scheme nung nisung 1,000 anioktsü

Guwahati, January 3, 2024

(Agencies): Assam sorkari Orunodoi scheme ulushiba osang metetdaksüogo aser iba nung Dima Hasao district kübok Diyungbra constituency nung beneficiaries 1,000 tasen bendenloktsü.

Assam nung sensaktiba kibongtem nem senotsü teyari agütsütsü atema Orunodoi scheme ya tenzüka lir.

Orunodoi scheme kübok low-income households nungi tetsür shiai ita shia stipend angutsü. Iba sen ya parnok health aser nutrition status tajungba akümtsü atema agütsür.

"Ni Diyungbra constituency nung alirtem dang election atemba sülen state sorkari

Orunodoi scheme kübok voters lakh 1.41 aser polling stations 280 lir.

Iba scheme ya December 1, 2020 nü tenzüker aser Orunodoi 2.0 ajungketogo. October 11, 2023 nü Chief Minister Himanta Biswa Sarma-i ashi.

"Iba ajanga tetsür 1,000-i ita shia parnok account nung Rs 1250" ta pai ashi.

State sorkari Diyungbra constituency nung kibong ajak nem ita asem tsüngda ration cards agütsütsü, ta pai ashi.

Assam State Election Commission-i January 8, 2024 nü North Cachar Hills Autonomous Council indang election agitsü metetdaksüogo.

North Cachar Hills Autonomous Council nung

Iba scheme ulushiba ajanga beneficiary lakh 7.3 bendenlokogo aser parnok züngsema nisung ajak agi lakh 26 kümogo. Orunodoi scheme kübok beneficiary shia nem ita shia Rs. 1,250 agütsür.

Orunodoi scheme teyari angutsüpurtem ya Assam nung permanent residents asütsüla aser family income lakh 2 teküpok asütsüla.

Japan menoknok lendong nung asür tali akümer



Menoknok tesashi anokba ajanga Suzu, Ishikawa Prefecture nung ki ka ladaktsür alidak rescue worker temi nisung bushiba noksa nung angur. January 1 nü Japan anüdoklen menok tesashi anoka ki o jen raksatsü aser nisunga 60 dak tema süogo aser ano maneni anoktsü akok ta ketdangsür temi ashir.

Tokyo, Aenjeti/January 3

(Agencies): Japan kübok Ishikawa prefecture nung Hombarnü menoknok tesashi ka anokba sülen teküzmükertemi maneni taküm alirtem bushidar. Kasa mapang nung ketdangsürtemi, tzunglu kanga sashia aruba, anentsüh aluba aser aftershocks aiben aruba ajanga teküzmükba maparen minprongsü akok ta metetdaksüogo.

Regional sorkari Bodhbarnü ashiba agi, menoknok lendong nung asür 62 jungogo aser nisung 300 dak tema yirur lir; yirur alirtemrongnungi nisung 20 bo kanga mejungi yirur lir.

7.6 magnitude tesashi menoknok ka agi Hombarnü Noto Peninsula kongshi aser anütoklen tziüküm nung Suzu tesem nung ki aika raksatsü aser iba ajanga mi lendong atalokdakja Wajima yimti nung tesem kar kanga mejungi raksa liasü. Menoknok agi lenmangtem raksatsüogo aser iba ajanga teküzmükba maparen inyaksü kanga tasak kümdaksüogo.

Nisung 32,800 dak tema tesem balala nung jenoka lir, ta sorkari ashi.

"Lendong ataloker ghonda 40 dak tema ogo. Nisung aika küzmüksü nungdaka aliba indang osang aika angazükogo aser nüburtem teyari atema atatepdar," ta Ato Kilonser Fumio Kishida-i, emergency task force senden ka amenba

sülen ashi.

"Local ketdangsürtem, police, firefighters aser tanga operational units temi teküzmükba maparen inyakdar aser kasa mapang nung personnel aser teküzmükba maparen balala nung amshiba azütem tali yokogo," ta PM-isa metetdaksü.

Kishida-i ashiba agi, Noto Peninsula nung menoknok agi tamajungtiba kongshir aliba tesemtem dangi rong ajanga teyari yoktsü merangdar, kechiyong lenmangtem kanga mejungi raksar lir. Japan Self-Defence Forces-ia, tesendaktep mejungi kümer aliba yimtsüngtem nem helicopter amshia teyari agütsüdar, ta Kyodo news agency sangdong ka ajanga metetdaksü.

Japan Meteorological Agency (JMA)-i tzunglu kanga sashia arutsü aser iba ajanga anentsüh aludaktsütsü akok ta metetdaksüogo aser iba ajanga teküzmükba maparen balala tali tebenjaba kümdaktsütsü.

Suzu nung Mayor Masuhiro Izumiya-i ashiba agi, ki timba chirepogo aser ka ana dang nokdaka lir.

"Jila nung ki shilem 90 bo ajunga mesüra ajunga amai chirepogo.. tensa kanga mejungi lir," ta pai ashiba TBS-i metetdaksü.

Ishikawa prefecture nung ki 34,000 nung power mali kümogo, ta local utility-i metetdaksü.

Kasa mapang nung yimti aika nung tziü agi anünga kümogo.

US Geological Survey-i ashiba agi, menoknok ya 7.5 magnitude tesashi liasü aser JMA-ia menoknok ya 7.6 magnitude tesashi liasü ta ashiba den tsunami arutsü akok ta tekümdangtsü metetdaksü, koba mapang tatsüka lir agina liasü.

Iba tesem 400 dak tema anokshiba sülen Hombarnü menoknok agi kongshia liasü, ta JMA-i metetdaksü.


Alima nung tectonic plates pezü Japan nung ajuruteper anungji iba linük ya menoknok agi mapangshia kongshir.

Japan nung küm shia menoknok noklang aika agi konshir, saka teraksatsüba kangabo mesüra khenyongi malir.

Hombarnü menoknok anokba lendong nung asür timba dang kümyonga odar, ajisüaka broadcast aser phone ajanga nüburtem nem mapang shitak nung osang agütsüba aser nüburtemi kanga kara telangzüba shidak agütsüba ajanga takoksa kangabo majangshi.

University of Tokyo professor Toshitaka Katada-i ashiba agi, nüburtem renemer liasü, iba den nüburtem anintsü atema sentong yanglur aliba takok angu aser jongdak mapang amshitsüba oset aser chiyongtsü amala kanga junga rizünga yua liasü.

Mulungnen O



ASO 13/06/1941

ASÜ 28/12/2023

Onoki teti meima aliba Obala **Chubanungba Pongen** (Longjang) anogo ishika shiranga aliba mapang nungi tasü nü (28th Dec 2023) tashi, onok mangyim jashi aser mulungzürep tia nung alidang, kija, loktibalala, tembartem, yimer yimsangertem ana aser talang nungi shirnokisa sarasadem den nepu, rongsen aser shisatsü agi yariogo, nenok ajak dang temolung taroktiba nungi kanga pelar. Onoki tsüngdong maruteter saka iba osang kakat ajanga nenok ajak dang pelaba lemsateper. Nenok mapa tajung asoshi tematiba Tsüngremi maneni moajangma.

Temeim Chirnur, Semchir, Anükapang aser Kinungertem.

MENUNGRA BILEMTETER



Asür A. Imdong Jamir (Molungyimsen) Tasüba Anogo : 04.01.2023

Nai onok toktsür or küm ka renteta arudang, nü Temeim sayu O aser Tamang sarasadem agi onok akhümbanger aruba bilemteta Tsüngrem tenüng asanger. Tanü na onok den meliaka, Nai kotak nungi onok asoshi sarasademtsüdar ta ozü tamang nüklai angur aser tasü aiter.

- Temeim kinungtsü, chirnur, semchirtem aser kinungertem.

OFFICE OF THE UNGMA LONGKUMER TUSHIN SEMCHIR TELONGJEM TENÜNGSANG AGÜTSÜR

Wapong. Imtimeren aser Watsü Late Songsongrenla na jabaso Wapong. Moatoshi Longkumer Rev. jenjang tashi ngutettsüsa asüngtetta inyaktetba asoshi kanga pelar aser tenüngsang agutsür. Tsüngremi nü tarutsü jenjang tajungtiba nung aniangma.

Ano Tuensang town Ao Baptist Arogo aser ABAM danga nenoki ozü nübu ka nem iba ama meraket korang tajung semtsü nung nenok danga kumrem pelar-a ta **UNGMA LONGKUMER TUSHIN SEMCHIR TELONGJEM DIMAPUR** ajanga pelaba lemsateper, Tsüngremi nenok ajak moajangma.

Sd/-
Wapang Lkr
Secy. ULTSTD

Beirut nung Hamas ketdangsür Saleh al-Arouri tepset

Beirut, Aenjeti/January 03

(Agencies): Israel-i drone amshia Beirut south tsütsü Dahiyeh tesem nung amakdang Hamas ketdangsür Saleh al-Arouri tepset, ta Palenstinian telok aser Lebanese osangtem ajanga ashir.

Al-Arouri ya Mongulbarnü Zionist temi amakdang asü, ta Hamas teloki par official channel nung ashi. Hamas ketdangsür Izzat al-Sharq-i ibai tasü mait mapa inyaka tepsetba lir ta ashi.

Al-Arouri ya Hamas telok nung sentong yangluba ketdangsürtem rongnung züngsem ka liasü aser pa ya mitkar inyakyim nung tongti

shilem agir ka liasü. Taoba mapang occupied West Bank nung aliba Hamas nung pa tanishir liasü.

Hamas ajanga Telegram channel nung sangdong ka agütsüba nung Hamas indang armed wing - Qassam Brigades - lenir Samir Findi Abu Amer aser Azzam Al-Aqraa Abu Ammar tepsetogo.

Parnokisa par telok nungi ano züngsem pezü tepsetba tenünga shia liasü.

Lebanon sorkar meyong National News Agency ajanga ashiba agi, iba lendong nung nisung trok aser ibai Israel nung drone ajanga lir.

Al-Arouri tepsetba mechi

Gaza nung par telok tasü ita nokdakba manokshitsü ta Hamas-i ashi, kong Palestine nung telok ya Israel sepaitem den rarar.

"Iba ya ajanga ano maneni tsükchir temi Gaza Strip nung par tashiyim amshitsü nükjidong nung tamakok aluba sayur," ta Hamas ketdangsür Izzat al-Rishq-i sangdong ka nung ashi.

Iba telok nung tekolakba Ismail Haniyeh-ia ibai kiralongra mapa ta aitsü aser ibai Lebanon indang temeden nung aibelenba lir aser Israel nungeri Palestine nung anema inyakba ulushia akuma lir, ta ashi.

Haniyeh-i television ajanga sangdong ka nung Hamas madak kodanga takok mangutsü, ta shia

liasü.

Israel nungi telangzüba kecha agüja mali. Hamas ketdangsür Saleh al-Arouri tepsetba atema Israel-i tenüng agia mali, saka shibai inyakar ibai Lebanon dak amakba masü ta tejangja sayur, ta Israel Ato Kilonser Benjamin Netanyahu indang adviser Mark Regev-i ashi.

"Shibai inyakar ya Hamas lenirtem dak amakba lir," ta Regev-i sensakemo ka nung ashi.

Lebanon Ato Kilonser Najib Mikati-ia Al-Arouri tepsetba aitsü aser pa indang office sangdong ka nung, Hamas den tesendaktep tajung aliba Hezbollah telok anogoshi Israel sepaitem den Israel north tsütsü khatetba

mapang Lebanon ano rara tasen kati atsür aotsü nükjidong nung inyak, ta ashi.

Hamas aser Hezbollah yariba lintük, Iran-ia al-Arouri tepsetba ajanga Israel anema nokdaker tali adoktsü, ta ashi.

October 7, 2023 nü nungi tenzüka tang tashi Israel-i Gaza amakdang Palestine nung nisung 22,313 tepsetogo aser 57,296 yiruogo, ta health ministry ajanga ashi.

Ano nisung meyirijang aika pei kidang nembang alitsü aser sür alitsü südi ta amanger.

Tesüiba ghonda 24 tsüngta Israel nungeri amakdang Palestine nung nisung 128 süogo aser 261 yiruba osang lir.

Junior wrestler temi longkak ait



Bodhbarnü Jantar Mantar, New Delhi nung wrestler Sakshi Malik, Bajrang Punia aser Videsh Phogat nung anema lanur wrestler temi longkak aitba mapang tangokba noksa nung angur.

New Delhi, Aenjeti/January 3 (Agencies): Junior wrestler temi, parnok indang career nung küm ka tashi tetsüdaktsü adokba anema Jantar Mantar, New Delhi nung longkak aita liasü.

Uttar Pradesh, Haryana, aser Delhi nungi junior wrestler temi tetsüdaktsü adokba ya wrestler Bajrang Punia, Sakshi Malik, aser Vinesh Phogat nung dak tai tongloktsü.

Chhaprauli, Baghpat nung Arya Samaj Akhara aser Virender Wrestling Academy, Narela densema wrestling academy balala nungi wrestler

300 shi adenshia Punia, Malik, aser Phogat nung anema yimyim ayima liasü.

Longkak aiter temi banner tem nung "UWW, item wrestler asem nungi onok kümzükang," ta zülua bener liasü.

Küm ka tejakdang Punia, Malik, aser Phogat nung anir iba tesem nung longkak aitba mapang nisung aikati parnok pusema liasü saka tang kasa tesem nung parnok asem anema nokdakdar. Parnok asem anir taoba Wrestling Federation of India (WFI) tir Brij Bhushan Sharan Singh

anema longkak aita liasü.

Ajisüaka junior wrestler temi parnok asem ajanga parnok training aser tetoktepba ajak sota yuogo ta bilemer.

2023 küm January ita nungi national camp aser tetoktepba ka danga agia mali, kechiyong WFI anaben tashi suspend sütsüogo aser ad-hoc panel kati dang iba asaya achaayangdar.

Jantar Mantar nung longkak aiter temi suspend sütsür aliba WFI amenokshitsü aser wrestling asaya achaayangtsü atema sports ministry-i shimmer aliba ad-hoc panel agintsü takhangba agütsüogo.

South Africa Tour atema HI-i asaya 39 shimogo

Aenjeti/January 3, 2023 (Agencies): Hockey India-i, Men's National Coaching Camp atema asayar 39 agi kümteba core group ka shimogo. Iba camp ya January 3 nungi Sports Authority of India (SAI), Bengaluru nung agitsü.

Cape Town, South Africa nung oa France, Netherlands aser hosts South Africa den 4 Nation Tournament masaya tsüngda anogo 11 camp ka agitsü ayongzükogo.

South Africa nung asayatsü aliba asayamung ya India team asoshi Paris Olympic Games atema renemshiba asayamung ka asütsü aser iba den Australia, Netherlands, Spain aser Ireland den February ita India indang FIH Hockey Pro League campaign atema renemshiba ka asütsü.

Camp indang jembiba mapang India tebur Hockey

Team Chief Coach Craig Fulton-i ashiba agi, "mapang tatsüka kinungertem den anisüngzüka amungba sülen asayartem asüngsashir adenshitsu imlar. Onok taküm hockey season South Africa nung oa asaya tenzüksü aser iba sülen Paris Olympics masaya tsüngda mazüangi asayatsü lir. Core group nung asayar tejentem aika densema lir aser parnok rongnung karbo Muscat, Oman nung FIH Hockey5s World Cup nunga asayatsü."

"Teti ama iba camp nunga team tajungba kuma yanglushitsü atema rangloker inyaktsü aser season tasenba atema onok yongya atar," ta Fulton-i shisem.

Asayartem yamai alitsü. Goalkeepers: Krishan Bahadur Pathak, Sreejesh Parattu Raveendran, Suraj

Karkera, Pawan, Prashant Kumar Chauhan

Defenders: Jarmanpreet Singh, Surender Kumar, Harmanpreet Singh, Varun Kumar, Amit Rohidas, Gurinder Singh, Jugraj Singh, Mandeep Mor, Nilam Sanjeep Xess, Sanjay, Yashdeep Siwach, Dipsan Tirkey, Manjeet

Midfielders: Manpreet Singh, Hardik Singh, Vivek Sagar Prasad, Moirangthem Rabichandra Singh, Shamsher Singh, Nilakanta Sharma, Rajkumar Pal, Sumit, Akashdeep Singh, Gurjant Singh, Mohd. Raheel Mouseen, Maninder Singh

Forwards: S. Karthi, Mandeep Singh, Lalit Kumar Upadhyay, Abhishek, Dilpreet Singh, Sukhjeet Singh, Simranjeet Singh, Shilanand Lakra, Pawan Rajbhar.



Directorate of Youth Resources and Sports, Govt. of Nagaland-i senötsü teyari agüja Nagaland Sepaktakraw team 67buba National School Games 2024 (U-17 aser U-19 tetsür aser tebur) nung shilem agitsü. Iba asayamung ya January 3 nungi 7 tashi Patna (Bihar) nung asayatsü.

NE United FC-i Coach Benali den tenangzüktepba yanglushi

Aenjeti/January 3, 2024 (Agencies): NorthEast United FC-i Bodhbarnü sangdong ka

ajanga head coach Juan Pedro Benali den tenangzüktepba yanglushiba sangdongogo. Pa den taruba season tashi tenangzüktepba yanglushiogo aser ano season ka atsülangshitsü atema lenmang sadema lapoka yuogo.

Juan lenisüba nung NorthEast United FC pur 2023-24 Indian Super League nung tang trokbuba nung lir. Asaya 12 asayaba sülen parnok point 12 ngua lir. Season tesadang ka asayatsü anunga lia NEUFC puri taoba season anguba point adenogo.

NorthEast United FC kibur John Abraham-i, Juan Pedro

Benali sempet dak tamang akaba lemsatepogo. "Fan tem ya NorthEast United mulung lir aser iba tenangzüktepba yangluba ya parnok atema onok bendanga agütsür aliba temaitsü lir. Juan-i asaya meimba aser lanur asyartem kanga junga anitetsü asoshi pa dak sempet aliba ajanga pa ya ozü team asoshi kanga tetemsü lir. Onok

longjemer taruba season tem atema alizüing tasen ka yanglua ayutsü," ta John-i ashi.

Kasa mapang nung Juan Pedro Benali-ia pa maneni nongita yariba atema kanga pelaba lemsatepogo.

"NorthEast United FC den tenangzüktepba yanglushiba atema kanga pelar. Club ketdangsurtemi kü dak tamang katetba ajanga ni tali ajungmesor. Temaba jenjang nung tokteptsü atema dang masü saka tarutsü nung football asayartem ajungmesotsü atema squad ka anitetsü asoshi onok bendanga agütsür lir. Onok longjemer NorthEast United FC ya India nung football asaya nung tashi ka küm daktitsü nükjiding lir," ta pai ashi.

Maneni NorthEast United FC CEO Mandar Tamhane-ia, "Juan den tenangzüktepba yanglushiba atema onok kanga pelar. Taoba ita 6-7 pai team nung temelenshi bener arutsüba onoki nguogo. Renloka aotsü atema tanen maka inyakyim ka nüngdaker aser Juan den tenangzüktepba yanglushiba ya iba den sendaka lir," ta ashi.

Emma Raducanu Australian Open Main Draw-i iogo



Aenjeti/January 3, 2024 (Agencies): Taoba U.S. Open champion Emma Raducanu Australian Open main draw-i iogo.

America tsür Lauren Davis tapu yiruba ajanga Bodhbarnü taküm asoshi mezüngbuba Grand Slam nung masayatetsüsa akümba sülen Raducanu main draw-i aitsü atema maongka ngua liasü.

Raducanu, shibai Ajisüaka Davis Mongolbarnü Auckland Classic nung Elena-Gabriela Ruse koka liasü, la tetsüing teloktep surgery agiba sülen maneni asaya tenzükogo aser la tang WTA rankings nung number 301 nung lir aser la Australia Open nung indang indanga asayatsü atema protected ranking teperi masü asü.

Arishi küm 21 tain asayar ya wildcard atema-a meshim aser qualifying rounds asayarang iba asayamung nung asayatsü liasü. 2021 küm la US Open nung qualifying round asayaba sülen main draw-i ai aser lai iba asayamung koka liasü, koba Open Era nung qualifying round nungi ia Grand Slam ka akokba mezüngbuba asayar liasü.

Karolina Muchova, Petra Kvitova, Irina-Camelia Begu aser Caty McNally nung ajak masayatetsüsa akümba sülen Raducanu main draw nung asayatsü atema maongka ngutetogo. Iba asayamung ya January 14 nungi 28 tashi asayatsü.

BILEMDANGANG

"Bilemdanger jenjang agiba ajanga lendong nungi jenbor."